

Seattle – Waaxda Caafimaadka Degmada King
Wargalinta Siyaasadaha Asturnaanta Xogta

Dhaqan Galaya 23, 2013

Wargalintani waxay qeexaysaa habka laga yaabo in loo adeegsado xogta caafimaad ee adiga kugu saabsan iyo sida xogtaas cidda haysaa ay cid kale ugu bandhigi karto, iyo waliba sida aad adigu xogtaas ku heli kartid. **Fadlan si taxadir leh u akhri.**

Dhigaalkan waxaa la heli karaa isagoo ku bandhigan qaabab kale oo waafaqsan waxa uu dhigayo Xeerka Dadka Maraykanka ah ee Naafada ah (ADA). Hadii aad u baahantahay dhigaalkan oo qaab kale ku bandhigan, fadlan xafiiska xidhiidhka ee ADA kala xidhiidh telefoonka ah: 206-296-4600 ama

Nuqulka ugu dambeeyay ee dhigaalkan waxaa lagu soo bandhigi doonaa dhamaan goobaha daryeelka caafimaad ee Waaxda Caafimaadka Guud (Caafimaadka Guud) ee Gobolka Seattle – Degmada King. Sidoo kale waxaa lagu soo bandhigi doonaa mareegtayada cinwaankeedu yahay www.kingcounty.gov/health.

Waaxda Caafimaadka Guud waxaa ka go'an inay ilaaliso xogtaada caafimaad ee gaarka ah. Xogtaada Caafimaad ee Dhawrsoon (PHI) waxaa ka mid ah xogta aanu abuurnay amaba xogta aanu adiga kaa helnay ee ku saabsan xaaladaada caafimaad, daryeelka caafimaad ee aad heshid iyo kharashka aad ku bixiso daryeelkaas caafimaad. Hadaba si aanu daryeel kuugu fidino, waxa waajib ah in Xogtaada Caafimaad ee Dhawrsoon (PHI) lagu kaydiyo laguna hayo nidaamyo elektiroonig ah.

Wargalintani waxay ku saabsantahay oo ay koobsanaysaa ashkhaastan hoos ku xusan ee iyagu daryeelka kuu fidiya:

Shaqaalaha, dhakhaatiirta, dhakhaatiirta cisbitaalka dagan, dhakhaatiirta ilkaha, shaqaalaha maamulka, shaqaalaha arrimaha bulshada, khubarada nafaqada, shaqaalaha xidhiidhka, ardayda barata caafimaadka, adeegayaasha daryeelka caafimaad ee bulshada, iyo waliba dhakhaatiirta ama adeegayaasha caafimaad ee kale ee iyagu daryeelka caafimaad kuugu fidiya goobaha ama barnaamijyada daryeelka caafimaad ee guud waxaa dhamaantood ku waajib ah in ay u hogaansamaan Wargalintan ku saabsan Siyaasadaha Sir Ahaanta Xogta. Waaxda Caafimaadka Guud waxaa u banaan inay xogtaada la qaybsato ama u bandhigto ashkhaasta ay wargalintani koobsanayso, si ay ugu suurto gasho inay daryeel caafimaad kuu fidiyaan.

Waxaa dhici karta inay jiraan xeerar qaar ah oo heer gobol ama heer qaran ah, xeerarkaas oo laga yaabo inay nagu waajibayaan in qaybo ka mid ah Xogta Caafimaad ee Dhawrsoon (PHI) aanu si dheeraad ah u ilaalino. Ilaalinta dheeraadka ah ee ay dhigayaan xeerarka gobolada ama xeerarka federaalku waxa suurtagal ah inay khuseeyaan xogta ku saabsan cudurada galmada lagu kala qaado, diiwaan-haynta ku saabsan adeegsiga daroogada ama khamriga ee qofka laga daweeeyay, diiwaan-haynta ku saabsan caafimaadka maskaxda ee qorka iyo waliba xogta ku saabsan cudurka HIV/AIDS. Waxaanu kaa qaadan fasax ka hor inta aanaan xogta noocan ah gudbin hadiiba ay dhacdo in sharcigu uu nagu waajibyo in aanu sidaa samayno.

Qaybta Kowaad – Xuquuqdaada la xidhiidha Xogtaada Caafimaad ee Dhawrsoon (PHI)

Waxaa hoos ku dhigan liiska xuquuqdaada la xidhiidha Xogtaada Caafimaad ee Dhawrsoon (PHI), oo ay garab taalo sharaxaad ku saabsan qaabka aad xuquuqdaas u adeegsan karto:

- Waxa aad xaq u leedahay inaad codsato in la xadido habka aan u adeegsano ama aanu cid kale ugu bandhigno macluumaadkaaga caafimaad. Waxaa kugu waajib ah in aad codsigaas qoraal ahaan ugu gudbiso xafiiska qaabilsan u hogaansamida sharciga (Compliance Office), waana in aad noo sheegto macluumaadka aad rabto in la xadido iyo cidda aad rabto inay ku koobnaadaan. Waaxda Caafimaadka

Guud qasab kuma aha inay xadidaadaas ogolaato, marka laga tago hal arrin. Wuxuu arrinkaasi la xidhiidhaa hadii aad si buuxda u bixisay kharashka adeeg caafimaad oo aad heshay, xogta adeegaas anagu uma soo bandhigi doonno shirkada caymiskaaga caafimaad, wixii ku saabsan lacag bixinta ama hawlgalada daryeelka caafimaad, hadii aad codsi qoraal ah soo gudbiso oo aad codsigaas ku dalbato inaan xogtaas cid kale lala wadaagin.

- Waxa aad xaq u leedahay inaad codsato qaabka ama habka aanu kuugu fidino wixii xog-gudbin ah ee qarsoodi ah. Tusaale ahaan, waxaa dhici karta in aanu boosta kuusoo dhigno ama telefoonka kaaga soo gudbino natiijooyinka shaybaadhada lagaa qaaday. Waxaa kuu banaan in aad ka codsato Waaxda Caafimaadka Guud in ay wixii xog ah hab gaar ah kuula qaybsato ama meel gaar ah kugula qaybsato. Tusaale ahaan, waxaa kuu banaan in aad naga dalbato in aanu xogta ku soo hagaajino ciwaanka goobta aad ka shaqayso oo aanaan gurigaaga ciwaankiisa kuugu soo hagaajinin. Waxaa sidoo kale kuu banana in aad naga codsato in aanu goobta aad ka shaqayso kugu soo wacno oo aanaan kugu soo wacin gurigaaga. Waxaa kugu waajib ah in aad codsigaas qoraal ahaan kusoo hagaajisid xafiiskayaga qaabilsan u hogaansamida sharciga (Compliance Office). Qasab kuguma aha in aad sharaxaad ka bixiso sababta aad codsigaa u codsanayso. Waxaa nagu waajib ah anaga in aanu codsigaaga fulino, hadii uu yahay macquul.
- Xaaladaha badankooda, waxa aad xaq u leedahay in aad fiiriso ama aad hesho nuqul ah warbixintaada, waxaana taa kamid ah in aad hesho nuqul elektroonig ah oo warbixintaada ah. Waxaa kugu waajib ah in aad codsigaas qoraal ahaan kusoo hagaajisid xafiiskayaga qaabilsan u hogaansamida sharciga (Compliance Office). Waxaa dhici karta in aanu kugu soo dalacno lacag la xidhiidha kharashka koobi garaynta iyo wixii kharashaad ah ee kale. Waxaa dhici karta in xaaladaha qaar aanu codsigaaga diidno, waananu kuu sheegi doonaa sababta aanu codsigaa u diidayno. Waxaa laga yaabaa in xaaladaha qaarkood aad xaq u yeelato in aad dalbato in dib u eegis lagu sameeyo go'aankayaga diidmada ah.
- Waxa aad xaq u leedahay in aad codsato in la saxo ama wax lagu daro kayd-haynta adiga kuu gaarka ah. Waxa aad ka dalban kartaa Waaxda Caafimaadka Guud in wax ka badal la sameeyo ama xog dhiman lagu daro hadiiba ay dhacdo in aad u malayso in khalad jiro. Waxa kugu waajib ah in aad codsigaa qoraal ahaan kusoo hagaajiso xafiiskayaga u hogaansamida sharciga (Compliance Office) oo aad codsigaa sababayso. Waxaa dhici karta mararka qaar in aanu qoraal ahaan ku diidno codsigaagaas. Waxaa ku fasaxan in aad diidamadaas ka jawaab celiso oo aad soo gudbiso warbixin qoraal ah oo aad nagu khilaafsantahay, isla markaana waxaa kuu banana in aad codsato in warbixintaas lagu daro kayd-hayntaada caafimaad.
- Waxa aad xaq u leedahay in aad hesho liiska ashkhaasta ama wakaaladaha loo diray xogtaada caafimaad. Waxa kugu waajib ah in aad codsigaa qoraal ahaan kusoo hagaajiso xafiiskayaga u hogaansamida sharciga (Compliance Office). Liiskaas kuma jirto ciddii xogtaada loo bandhigay ee sababta loogu bandhigay ay ahayd mid la xidhiidha daawayntaada ama lacag-bixin ama hawlaha daryeelkaaga caafimaad. Sidoo kale liiskan kuma jirto xogta adiga ama qoyskaaga si toos ah loogu gudbiyay, ama wixii xog ah ee cid loo diray ee aad adigu qorarl ahaan ku fasaxday in la diro.
- Waxa aad xaq u leedahay in aad hesho nuqul waraaq ah oo ah nuskhada ugu dambaysa ee Wargelintan, hadii aad codsato.
- Waxa aad xaq u leedahay in aad dib uga noqoto fasaxa aad noo fasaxday in aanu bixino xogtaada. Hadii aad saxeexday fasaxaad aad fasaxaso in la isticmaalo ama shaaca laga qaado xogta, waxaa kuu banaan in aad dib uga noqoto fasaxaadaas wakhtiga aad rabto. Dib ula noqoshadaasi waa inay noqotaa mid qoraal ah, waana in aad kusoo hagaajiso xafiiskayaga u hogaansamida sharciga (Compliance Office). Arrinkaasi wax saamayn ah kuma yeelan doono xogta dib ula noqoshadaas horteed la adeegsaday ama shaaca laga qaaday.

Hadaba si aad u adeegsato xuquuqdaada uu sharcigu ku siinayo, waxa aad wacdaa nambarada telefoonada ku liis garaysan dhigaalkan. Waxa aad sidoo kale qoraal u gudbin kartaa xafiiskayaga u hogaansamida sharciga (Compliance Office) ama waxa aad booqan kartaa mid ka mid ah goobaha Waaxda Caafimaadka guud. Shaqaalahayaga ayaa kaa caawin doona codsigaaga.

Qaybta Labaad – Masuuliyadaha saaran Waaxda Caafimaadka Guud ee Sharcigu Dhigayo

Waaxda Caafimaadka Guud wuxuu sharcigu ku waajibinayaa inay kuu soo gudbisno Wargalinta Siyaasadaha Asturnaanta Xogta. Xeerkani waa Xeerka La xisaabtanka iyo Gudbinta Caymiska Caafimaad ee sannadka 1996. Xeerkani wuxuu dhigayaa in ay waajib nagu tahay in aanu ilaalino sir ahaanta Xogtaada Caafimaad ee Dhawrsoon (PHI). Xogtaada Caafimaad ee Dhawrsoon (PHI) waa xogta aanu aburnay amaba xogta aanu adiga kaa helnay ee ku saabsan xaaladaada caafimaad ama kharashka daryeelkaaga caafimaad ee aad bixisay. Waxa xogtan ka mid ah warbixintaada caafimaad ee kayd-san iyo xogtaada shakhsi ahaaneed, sida magacaaga, Lambarka Caymiska Bulshada, ciwaanka iyo lambarka telefoonka.

Waxaa nagu waajib ah:

- In aanu ilaalino sir ahaanta Xogtaada Caafimaad ee Dhawrsoon (PHI), marka laga reebo waxa ay Wargalintani dhigayso
- In aanu ku dhaqano shuruudaha Wargalintan ee wakhtigan xaadirka ah dhaqan galka ah
- In aanu kaa qaadno fasaxaad qoraal ah markasta oo aanu isticmaalayno ama shaaca ka qaadayno xogtaada hadii isticmaalkaas ama shaac ka qaadistaasi uu ka baxsan yahay waxa ay Wargalintani koobsanayso.
- In aanu ku wargalino hadii ay dhacdo in lagu xadgudbo Xog Caafimaad oo Dhawrsoon (PHI) oo uusan amaankeedu sugnayn.
- In aanu ku siino Wargalintan

Waxaanu xaq u leenahay in aanu badalno siyaasadahayaga ku saabsan Xogta Caafimaad ee Dhawrsoon (PHI) ee aanu kaydino. Hadii aanu wax ka-badal samayno, waxaanu cusboonaysiin doonaa Wargalintan oo waxaanu ka dhigi doonaa mid aad heli karto. Nuqulka ugu dambeeya ee Wargalintan waxaa lagu soo bandhigi doonaa dhamaan goobaha daryeelka ee taabacsan Waaxda Caafimaadka Guud, iyo waliba mareegtayada ciwaankeedu yahay www.kingcounty.gov/health.

Qaybta Saddexaad - Siyaabaha laga yaabo in aanu u isticmaalno shaacana uga qaadno xogtaada caafimaad:

Waaxda Caafimaadka Guud waxay Xogta Caafimaad ee Dhawrsoon (PHI) u isticmaashaa shaacana uga qaadaa dhawr siyaabood oo la xidhiidha daawayntaada iyo bixinta aad bixiso kharashka daryeelka caafimaad ee lagu fidiyo iyo hawlaha la xidhiidha daryeelkaaga caafimaad. Waxa suurtagal ah in Xogta Caafimaad ee Dhawrsoon (PHI) FAX ahaan lagu gudbiyo ama lagu diro iyadoo ujeedada gudbintaas ama diristaasi ay la xidhiidho daawayn, lacag bixin ama hawlo la xidhiidha daryeelka caafimaad. Waxa aad xaq u leedahay in aad naga dalbato in aanaan xogtaada ku dirin FAX ahaan. Waxaa hoos ku dhigan tusaalayaal muujinaya siyaabaha aanu u isticmaali karno ama shaaca uga qaadi karno xogtaada caafimaad ee kuu gaarka ah anaga oo aan kaa fasax qaadanin.

Marka aanu ku daawaynayno; tusaale:

- Waxaa noo banaan in aanu xogtaada caafimaad adeegsano si aanu kuugu fidino daawayn caafimaad ama adeegyo caafimaad. Waxaa noo banaan in aanu daboolka ka qaadno xogtaada caafimaad oo aanu siino dhakhaatiirta iyo kalkaaliyayaasha caafimaad iyo hawl-wadeenada daryeelka caafimaad ee kale ee ku hawlan daryeelkaaga. Tusaale ahaan, dhakhtarkaagu waxa uu u baahanyahay in uu ogaado in ay jiraan wax dawooyin ah oo aad xasaasiyad ka qabto ama uu jidhkaagu diido. Waxaa dhakhtarka u banaan in uu xogtaas la wadaago farmashiistaha (daawo yaqaanka) iyo dadka kale ee daryeelkaaga ku hawlan.
- Waxaa sidoo kale noo banaan in aanu xogtaada caafimaad siino hawl wadeenada kale ee daryeelka caafimaad kuu fidinaya. Tusaale ahaan, waxa laga yaabaa in aanu u baahano in aanu dhakhtarka takhasuska (specialist) u sheegno xaaladahaaga caafimaad hadii ay dhacdo in aanu kuu dirno dhakhtarka takhasuska si aad u heshid daryeel caafimaad oo munaasib ah.

Marka aanu kaa qabanayno adeegyada aanu fidino kharashkooda ama marka aanu rabno in aanu kaa qaadano fasaxaad la xidhiidha caymiskaaga oo ku saabsan adeegyada aanu kugula talino' tusaale:

- Hadii aad haysato caymis caafimaad, waxaanu shirkada caymiskaaga caafimaad bixisay ka dalbanaa inay bixiyaan kharashka adeegyada aanu kuu fidino. Tusaale ahaan, waxa dhici karta in aanu u baahano in shirkada caymiskaaga caafimaad bixisay aanu u gudbino xog ku saabsan booqashada aad dhakhtarka booqatay, xanuunada lagaa helay, daawaynta iyo qalabka ama daawooyinka la isticmaalay, si markaa ay u suurto gasho in lanoo magdhabo kharashka daawaynta aanu ku daawaynay. Si kasta ha ahaatee, anaga oo aan kaa fasax qaadan xogtaada caafimaad siin mayno cid saddexaad oo aan shirkada caymiska ahayn, ciddaasoo iyadu kharashka daawayntaada wax ka bixinaysa, waxaase taa aan ku jirin hadii uu sharcigu nagu qasbo in aanu xogtaada caafimaad siino ciddaas saddexaad anaga oo aan kaa fasax qaadan.
- Waxaa sidoo kale noo banaan in aanu shirkadaada caymiska caafimaad u sheegno daawaynta lagugula taliyay si aanu iyaga marka hore ogolaansho uga helno, waa hadii shirkada caymiskaaga ay shardi u tahay in marka hore ogolaansho laga qaato. Tusaale ahaan, hadii aad u baahato qaliin, waxaanu wici doonaa shirkada caymiskaaga si aanu u hubino in qaliinkaasi uu caymiska ku jiro oo ay shirkada caymisku kharashkiisa bixin doonto.

Marka la fulinayo hawlgalada caafimaad; tusaale:

- Waxaa noo banaan in aanu isticmaalno ama aanu daboolka ka qaadno xogtaada caafimaad si aanu u maarayno barnaamijyada-yada iyo hawlahayaga. Tusaale ahaan, waxaa noo banaan in aanu xogtaada caafimaad adeegsano si aanu u qiimayno tayada adeegyada lagu fidiyo ama si aanu shaqaalahayaga tababar u siino.
- Waxaa noo banaan in aanu isticmaalno ama aanu shaaca ka qaadno xogtaada caafimaad si aanu kuula soo xidhiidhno anaga oo adeegsanayna telefoonka ama boosta, oo aanu kuu xasuusino in aad dhakhtarka ballan la leedahay ama aanu kuugu wargalino natiijada shaybaadhkaaga kasoo baxday.

Cilmi-baadhis awgeed: Waxaa noo banaan in aanu isticmaalno ama aanu shaaca ka qaadno xogtaada caafimaad ujeedooyin cilmi-baadhista la xidhiidha awgood.

Hawlo wadajir ah awgood: Waxaa hawladeenada bixiya daryeelka caafimaad u banaan in ay isticmaalaan ama wadaagaan xogtaada caafimaad si ay usii xoojiyaan hawlaha ay iyagu dhexdooda wadajirka u qabtaan iyo hawlaha ay sida wadajirka ah u wada qabtaan ashkhaasta ama ururada kale ee iyagu ka qayb gala wixii ah daawayn ama lacag-bixin ama hawlo kale oo la xidhiidha daryeelka caafimaad ee si wadajir ah loo fuliyo.

Xaaladaha uu sharcigu waajibinayo: Waxa noo banaan in aanu adeegsano ama aanu shaaca ka qaadno Xogta Caafimaad ee Dhawrsoon (PHI) marka uu sharciga heer gobol ama heer qaran uu sidaa dhigayo.

Talaabooyinka sharci ee maxkamadeed ama maamul: Waxaa noo banaan in aanu shaaca ka qaadno Xogta Caafimaad ee Dhawrsoon (PHI) si aanu uga jawaab celino amar maxkamadeed ama amar maxkamad maamul, ama si aanu uga jawaab celino u yeedhis maxkamadeed, codsi xaqiiqo-raadineed ama wixii kale ee talaabooyin ah ee sharciga wafaqsan.

Ujeedooyinka la xidhiidha fulinta sharciga: Waxaa noo banaan in aanu Xogta Caafimaad ee Dhawrsoon (PHI) siino saraakiisha fulinta sharciga qaabilsan.

Warbixinaha iyo hawlaha dambi baadhiseed ee la xidhiidha waxyeelooyinka: Waxaa noo banaan in aanu isticmaalno ama aanu shaaca ka qaadno xogta ku saabsan xaaladaha ay dhacdo in uu yimaado shaki ku saabsan in ay dhacday waxyeelo ama baylah amaba ay dhaceen dibindaabyada guryuhu, waa hadii uu sharcigu sidaa waajibiyo.

Dhakhaatiirta/masuuliyiinta baadha sababaha dhimashada: Waxaa noo banaan in si waafaqsan sharciga jira aanu u isticmaalno ama aanu shaaca uga qaadno Xogta Caafimaad ee Dhawrsoon si aanu dhakhaatiirtaas ama masuuliyiintaas ugu suurtagalino inay waajibaadkooda gutaan.

Si aanu ugu hogaansanno xeerarka magdhawga shaqaalaha: Waxaa noo banaan in Xogta Caafimaad ee Dhawrsoon (PHI) aanu u isticmaalno ama aanu shaaca uga qaadno hab waafaqsan sida ay fasaxayaan xeerarka ku saabsan magdhawga shaqaalaha amaba barnaamijyada kale ee bixiya gunooyinka loo

goondeeyay dhaawacyada ama xanuunada ka dhasha arrimo la xidhiidha shaqada iyadoo aan la eegayn cidda leh khaladka sababay dhaawacyadaas ama xanuunadaas.

Ujeedooyinka la xidhiidha ku deeqida unugyada jidhka, indhaha ama maqaarka: Waxaa noo banaan in aanu shaaca ka qaadno Xogta Caafimaad ee Dhawrsoon (PHI) oo aanu siino ururada ama hayadaha soo uruuriya ama soo hela unugyada jidhka.

Shaqooyinka dawlada ee gaarka ah: Waxaa noo banaan in aanu xogta isticmaalno ama aanu siinoo wakaaladaha iyagu maamula barnaamijyada dadwaynaha faa'idooyinka u leh. Tusaale ahaan, Waaxda Caafimaadka Guud waxa u banaan in ay bixiso xogta si loo jaangooyo gunooyinka dheeraadka ah ee dakhliga amaanka (SSI). Sidoo kale waxaa noo banaan in aanu xogta u gudbino masuuliyiinta xukuumada si ay ugu qabtaan shaqooyin si cayiman loo tilmaamay, sida amaanka qaranka ama dhaqdhaqaaqyada milatari, amaba goobaha dhaqan celinta.

Si looga hortago khataraha waawayn ee ka dhanka ah caafimaadka ama amaanka: Waxaa noo banaan in aanu Xogta Caafimaad ee Dhawrsoon (PHI) aanu shaaca ka qaadno marka aan yaqiinsano in shaac ka qaadistaasi ay lagama maarmaan tahay si looga hor tago khataro waawayn oo ka dhan ah caafimaadka ama amaanka qof shakhsi ah amaba bulshada guud ahaanteed.

Ujeedooyinka la xidhiidha caafimaadka iyo amaanka guud kolba inta sharcigu uu fasaxayo ama uu waajibinayo: Waxaa noo banaan in aanu shaacka ka qaadno Xogta Caafimaad ee Dhawrsoon (PHI) oo aanu u gudbino wakaaladaha masuulka ka ah kormeerka daryeelka caafimaad, si ay u gutaan hawlaha kormeerka noocaas ah ee sharcigu uu fasaxayo.

Gargaarka masiibooyinka: Waxaa noo banaan in aanu isticmaalno ama aanu shaaca ka qaadno Xogta Caafimaad ee Dhawrsoon (PHI) ee adiga kugu saabsan si aanu uga gacan gaysano dadaalada gargaarka ah ee masiibooyinka la xidhiidha.

Hawlaha wadajirka ah ee Nidaamyada Daryeelka Caafimaad ee Habaysan (OHCA): Waaxda Caafimaadka Guud waxay qayb ka tahay mid ka mid ah Nidaamyada Daryeelka Caafimaad ee Habaysan (OHCA), kaas oo ay ka mid yihiin hayado kale oo bixiya daryeelka caafimaad oo qayb ka ah shirkada OCHIN. OCHIN waxay bixisaa adeegyada tiknoolajiyada iyo adeegyada kale ee la xidhiidha, waxaanay ka hawl gashaa hawlaha ku saabsan qiimaynta iyo wanaajinta tayada iyadoo ku hadlaysa magaca ururada ku bahoobay. Tusaale ahaan, OCHIN waxay isku dubaridaa hawlaha qiimaynta caafimaad iyadoo ku hadlaysa magaca ururada ku bahoobay, si loo aasaaso dhaqamada ugu wacan isla markaana loo qiimeeyo faa'idooyinka caafimaad ee laga heli karo isticmaalka nidaamyada elektorooniga ah ee kayd-haynta warbixinaha caafimaad. OCHIN waxay sidoo kale hayadaha ku bahoobahay ka caawisaa sidii ay isaga kaashan lahaayeen wanaajinta habka loo maareeyo bukaan-socodka iyo bukaan-jiifka. Waxaa Waaxda Caafimaadka Guud u banaan in ay xogtaada caafimaad la wadaagto hayadaha kale ee ku bahoobay OCHIN marka loo baahdo, si loo fuliyo ujeedooyinka la xidhiidha daawayn ama lacag bixin ama hawlaha daryeelka caafimaad ee OCHIN. Liiska ururada ku bahoobay wakhtigan xaadirka ah shirkada OCHIN waxaa laga heli karaa mareegta ciwaankeedu yahay <https://ochin.org/our-members/ochin-members/>

Is-waydaarsiga xogta caafimaad (HIE): Waxaa noo banaan in aanu qaab elektroonig ah usoo bandhigno Xogtaada Caafimaad ee Dhawrsoon oo aanu xogtaas sii marino khidmad iyadu fududaysa is-waydaarsiga macluumaadka iyo xogta, kadibna ay khidmadaasi u dirto hawladeenada daryeelka caafimaad, shirkadaha caymiska iyo shirkadaha u dhexeeya cisbitaalada iyo shirkadaha caymiska markay dalbadaan macluumaadkaaga si lagu daaweeyo ama markay dalbadaan in daawayntaas lacagteeda la bixiyo. Kamid ahaanshaha aanu kamid nahay khidmadaha is-waydaarsiga macluumaadka caafimaad waxay noo fasaxaysaa in aanu aragno macluumaad adiga kugu saabsan oo ka yimi ururada kale ee iyaguna khidmada kamidka ah.

Kamid ahaanshaha aad kamidka tahay Is-waydaarsiga xogta caafimaad (HIE) waa arrin tadawuc ah oo aan qasab ahayn, waxaana aad xaq u leedahay in aanad ka qayb noqonin. Markasta oo ay suurtagal noqoto, waxaanu ku siin doonaa macluumaad xog-siin ah ka hor inta aanad ka qayb galin khidmadaha noocaas ah. Si aad u hesho macluumaad dheeraad ah, fadlan la xidhiidh xafiiska u hogaansamida sharciga (Compliance Office) ee taabacsan Waaxda Caafimaadka Guud.

Siyaabaha kale ee loo isticmaali karo ama shaaca looga qaadi karo xogtaadu waxay u baahan yihiin in fasax qoraal ah lagaa helo: Guud ahaan, Waaxda Caafimaadka Guud kama qaybqaadato wixii hawla ah ee la xidhiidha suuq-geynta, qoraalada ay dhakhaatiirta maskaxdu ka qoraan bukaanka, amaba iibinta Xogta Caafimaad ee Dhawrsoon (PHI). Si kasta ha ahaatee, waxaa nagu waajib ah in aanu kugu wargalino in badiba loo baahanyahay in lagaa fasaxqaato marka Xogta Caafimaad ee Dhawrsoon (PHI) loo adeegsanayo ujeedooyinkaas kor ku xusan.

Siyaabaha kale ee loo isticmaali karo ama shaaca looga qaadi karo xogtaada ee aan lagu qeexin Wargalintan kaliya waxay fasaxan yihiin marka uu sharcigu fasaxo ama marka aad adigu fasaxaad qoraal ahaan ah aad bixiso. Waxaa kuu banaan in aad dib uga noqoto fasaxaadaas aad fasaxday adeegsiga ama shaac ka qaadista Xogta Caafimaad ee Dhawrsoon (PHI) wakhtiga aad doonto; waana in ka noqoshada fasaxaadaasi ay qoraal ahaataa.

Qaybta Afraad – Sideebaad nooga dalban kartaa caawimo ama aad cabasho usoo gudbin kartaa

Si aad u hesho macluumaad dheeraad ah, fadlan la xidhiidh:

Xafiiska u Hogaansamida Sharciga
Seattle - King County Department of Public Health
401 5th Avenue, Suite 900
Seattle, WA 98104
Phone: 206-263-8255
TTY Relay: 711

Hadii aad aaminsantahay in xuquuqdaada sir ahaanta aad u leedahay lagu xadgudbay, waxa aad u caban kartaa Xafiiska u Hogaansamidda Sharciga ee taabacsan Waaxda Caafimaadka Guud, waxaanad ku hagaajin kartaa ciwaanka kor ku xusan. Sidoo kale waxaad u caban kartaa wasiirka wasaarada caafimaadka iyo adeegyada bulshada, waxaanad ku hagaajin kartaa ciwaanka hoos ku xusan. Wax aar-goosi ahi ma jiro hadii aad naga cabato.

Xafiiska Xuquuqda Madaniga ah
Medical Privacy, Complaint Division
U.S. Department of Health and Human Services
200 Independence Avenue, SW, HHH Building, Room 509H
Washington D.C., 20201

Phone: 866-627-7748
TTY: 866-788-4989
Online: www.hhs.gov/ocr